

**RAIMUNDI
CECCHETTI ORATIO
IN FUNERE JO.
ERNESTI HARRACHII
EPISCOPI...**

Raimondo Cecchetti



6
51

RAIMUNDI CECCHETTI

ORATIO IN FUNERE

JO: ERNESTI

HARRACHII

EPISCOPI NITTRIENSIS

—

188

AMPLISSIMO AC NOBILISSIMO VIRO

A L O Y S I O

HARRACHIO COMITI

F E L I C I T A T E M.

IOS. DIONYSIUS CRIBELLUS. D.

CUM summa semper Raimundus Cecchetti benivolentia, atque observantia JO: ERNESTUM filium tuum in vita coluisset, & ab eo se mirifice diligi, & honestissimis officiis ornari intellexisset, jam tum, cum acerbissimus illius mortis casus incidet, statuerat aliquid de ingenio exarare, quod grati, & memoris animi indicium faceret. Verum multa in causa fuere, quamobrem usque ad hoc tempus produceret. Primum ipsa doloris vis, cum adhuc recens exarderet, mentis aciem impediebat: deinde consecuta cura, quae animum a litteris abducerent: Accesserat demum quadam hominis altius in animo insidens in publicum prodeundi verecundia, quae, etsi praesentis aegritudinis sensui

tum cessisset, ubi tamen primus ille doloris ætus deferbuit, rursus ad ingenium se suum recipere instituebat. Ego vero cum primum aliquid otii eum natum esse cognovi, non destitit hominem mihi amicissimum, & ad officia promptum incitare, ut susceptum consilium perficeret. In ejus tandem animo a pietatis ratione metus reprehensionis superatus ita est, ut nonnihil meis cohortationibus tribuendum existimem. Hanc igitur lucubrationem quanquam alieno labore partam, meo tamen desiderio, atque officio propeeductam, mihi potissimum sumpsi, ut typis edendam, tibi que, Vir amplissime, me, mittendam curarem. Neque profecto mihi aptius quicquam, aut optatius poterat accidere, quam, ut possem, si non princeps existere præclarissimi Antislitis, & de me imprimis meriti virtutis celebranda, at laudis proferenda, & in omnem posteritatem propaganda interpretem gerere. Neque rursus cui potius committerem, atque tibi hanc mea in domesticam vestram dignitatem voluntatis, & observantia declarationem, puto esse quemquam. Excipe igitur, Vir amplissime, ea, qua soles in me esse benevolentia, consentaneum tuæ pietati munus; quod carissimi filii manibus certe acceptum, tibi vero valde honestum, bonis plane omnibus perjucundum fore confido. Vale.

Id Maii. cId. Id. ccxl.

SI



SI quanta amplitudine, atque celebritate doloris JOANNIS ERNESTI HARRACHII Pontificis Nitriensis mortem proſecutam eſſe intelligo, tanta ſit copia, & gravitate orationis ipſe laudandus, nemo proſecto tam diſertus inveniri poteſt, nemo tam vel ab arte, vel a natura ad dicendum paratus, quem non incredibilis rei magnitudo, ac difficultas a dicendo deterreat. Video enim omnes proſus Civitatis ordines peregrini hominis interitum ita dolere, ut Civem quemque cariſſimum nunquam tanta luſtus acerbitate dolendum putaverint. Dolent proceres eximium civilis virtutis exemplum ereptum, dolent Præſules ſuæ ampliſſimæ ſocietatis dignitatem immi- nutam, dolent docti viri magnum ſcientiarum decus, ac patrocini- um ablatum, plebs ipſa univerſa non mediocrem beneficentiæ fructum morte interceptum, populariſque comitatus veluti formam ſubito confractam eſſe vehementiſſime dolet. Luget præterea

universa Italia, cujus nullus est tam longinquus locus, quo non ejus excellentis in omni genere virtutis non solum opinio, sed etiam amor, admiratioque pervaserit: præcipuo quodam dolore angitur Germania, quod domestici nominis splendidissimum ornamentum amiserit: ipse CAROLUS Romanorum Imperator non mediocriter dolendum existimat, quod hominem sibi carissimum, optimeque de se meritum, quem regali amore, & sapientissimo quodam judicio suo mirifice diligeret, quem maximarum rerum aptissimum, probatissimumque interpretem, ac perfectorem haberet, in florentissimo excelsæ cujusdam spei cursu sentiat luctuosissimo casu esse sublatum: quidquid denique est hominum per universam propemodum Europam ab elegantia, aut a quovis animi cultu non abhorrentium, quibus vel universis, vel certe quamplurimis infinitæ suavitates ingenii, officii, humanitatis illius cognitæ essent, atque perspectæ, tanquam extinctas humani generis delicias conqueruntur. Quamobrem optime video me, etiamsi tantis doctrinæ, & eloquentiæ præfidiis valerem, quanta in homine vix reperiri possunt, huic tamen tanto muneri longe imparem esse futurum, si ad normam doloris revocanda sit expectatio Orationis. Ego enim ipse,

qui

qui illum animum velut omnium virtutum domicilium admirabar, qui perpetuam illius de me, ac de omnibus benemerendi cupiditatem intelligebam, qui suavissimis illis moribus jam diuturna familiaritate delectabar, cum tam jucunda, ac tam honesta consuetudine me privatum videam, majorem animo capio dolorem, quam vel flendo, vel dicendo possit expleri. Verum si meo, si vestro, si universo cum Jugendi, tum ornandi hominis desiderio satisfacere minime possum, at indulgere oportet omnino. Non enim doloris mei ratio ejusmodi est, ut moderationem consilii patiatur, possitque aut a magnitudine rei suscipiendæ, aut ab eventus periculo, aut a reprehensionis metu restitui, vel retardari. Neque vero committendum est, ut cui omnium laudum fructus debetur, is propterea omni propterea laude careat, quod maxime dignus habeatur. Si igitur nemo est, qui ejus virtutes recte possit Oratione complecti, si contra æquum est, ut eas omnino laudibus celebremus, id sane ad me potissimum pertinere arbitror, qui etsi ingenii, & eloquentiæ facultate, quæ in præsentia non magnopere est attendenda, minus ceteris valeo, at misericordiæ sensu, beneficiorum memoria, benemerendi voluntate, rerum etiam dicendarum notitia,

quæ res ad hoc officium maxime spectant, ceteris omnitus facile præsto. Itaque, Auditores, dum rem propositam aggredior, duo a vobis peto; primum ut quæ explicaturus sum ita excipiat, ut potius grati animi, & amantissimi officium, quam absolutæ laudationis munus me obire voluisse putetis; alterum ut sic habeatis, me nihil nisi ad veritatem dicturum, nullamque ei falsam laudem esse affuturum.

Sæpenumero lectione, aut memoria repetenti, quæ de bonorum natura Sapientes veteres scripta reliquerunt, tum demum mihi plane probanda videri solet eorundem bonorum ab iis instituta partitio, si tum quæ a fortuna, tum quæ a natura proficisci dicuntur, neque prorsus a ratione aliqua, neque semper a laude sejuncta esse existimentur. Credo enim ego eorum dispensationem non casu, aut temeritate regi, sed certo quodam supremi numinis consilio ita administrari, ut quamvis ratio ipsa providentiæ non raro a nostris sensibus remota esse videatur, eam tamen & semper dominari, & omnia ad humanarum rerum constitutionem felicitatemque referre sit affirmandum. At JOANNI ERNESTO nihil est, quod suspicari possit non summæ, & quam perspicuæ rationis æquitate contigisse, ut omni bonorum genere cumulatissime

latissime locupletaretur. Si enim ab ea familia ortum duxerat, quæ opibus, quæ potentia, quæ auctoritate, quæ honoribus, quæ affinitatibus inter Germanorum nobilissimas maxime floret; si longinquæ, ac perennis majorum virtutis exempla obtinuerat; si domesticæ gloriæ usque ad hoc tempus insulis, purpura, magistratibus, imperiis contestatæ nactus erat monumentatum vero si mirifica mentis acies, si animi cellitas, si ingenii facilitas, si oris commendatio, si cetera denique illi naturæ præsidia inerant, pro quibus sibi vel invito hominum opinionem, atque benevolentiam conciliaret; hæc omnia profecto in eum non temere putandum est esse conjecta, sed consulto collata, veluti adjumenta maximæ illius virtutis, quam suprema vis providentiæ ea mente in ejus animo fingere decreverat, ut insigne omnibus documentum propositum esset, & vitæ in maxima rerum humanarum celebritate honestissime peragendæ, & mortis in summa omnium bonorum prosperitate religiosissimæ obeundæ. Ex quo affirmare omnino necesse est, ipsa bona, quæ in ceteris hominibus plerumque fortuita & habentur, & dicuntur, in JOANNE ERNESTO ita ad animum pertinuisse, ut ejus virtus ipsam fortunam in societatem laudis vocasse videatur.

Hoc

Hoc habuit ille tum genus, tum ingenium; videamus institutionem. Intellexistis, AA, me de ejus genere ita dixisse, ut potius non prætermissum a me, quam explicatum videretur: neque de tot summis, clarissimisque ejus familiæ viris quemquam commemorandum duxisse præter unum JOANNEM ERNESTUM, a quo uno omnes Orationis meæ vires penitus exhauriuntur. Nunc vero cum de ejus institutione aliquid dicendum sit, se sponte ingerit orationi splendidissimus, & gravissimus vir ALOYSIUS HARRACHIUS JO: ERNESTI Pater, quem etiamsi voluisssem silentio præterire, ipsa tamen laus filii in tacitam quandam sui communionem rapuisset. De quo tamen non est quod multa a me expectetis. Non enim commemorabo generis dignitatem ab ipso non servatam solum, sed auctam, non amplissimos magistratus præclarissime gestos, non favorem Cæsaris virtute partum, non summum gradum in secretiore confessu Principis adeptum. Sunt hæc omnia cum in luce posita, tum ab instituto nostræ Orationis aliena. Hoc unum dicam, quod maxime ad rem propositam pertinet, eo illum fato esse natum, ut eximie sobolis parens esset, ut plurimos filios procrearet magno excelsoque animo omnes, & maximarum rerum gerenda-

rendarum appetentissimo ; ea vero sapientia , & consilio esse præditum , ut quam felicitatem nactus esset in liberis suscipiendis , ad eandem esset in educandis disciplinam eligendam adhibendamque maxime aptus . Quare in omnibus excolendis eam curam adhibuit , ut qui extant , satis ostendant quantum , & quam præclarum paternæ disciplinæ fructum retulerint . At cum vidisset in egregia JOANNIS ERNESTI indole excellentius quiddam elucere , præcipuam diligentiam in hunc potissimum conferendam putavit . Eum adhuc puerum hominibus prudentia , & doctrina probatissimis tradidit moribus , litterisque imbuendum : qua ætate miro eruditionis proventu exacta , curavit , ut varias peregrinationes institueret , pro quibus ea , quæ litteris didicisset , usu sapientiore magistro confirmaret . Ipse vero omnia peritissimo consiliorum , & itinerum suorum sibi dato moderatori mira docilitate referens , non ad speciem regionum , non ad pulchritudinem Urbium , non ad inanum spectaculorum novitatem , sed ad varios gentium mores , ad diversa populorum instituta , ad multiplices gubernandæ Reipublicæ rationes , ad artium commoda , ad locorum opportunitates animum , cogitationemque convertibat . Incredibili studio flagrabat earum

earum rerum omnium cognoscendarum, ex quibus aliquid accedere ad cultum animi intelligeret. Non provinciam, non urbem, non oppidum præterire consueverat, quin diligentissime vestigaret si quis esset vel rerum gerendarum scientia peritus, vel litteris clarus, vel quavis ingenue facultatis laude cognitus. Eos omnes sibi conciliandos curavit, omnibus familiariter usus est, ab omnibus aliquem vel prudentiæ, vel doctrinæ fructum percepit. Litterarum vero studiis in hac tam illustri peregrinatione perpetuam operam dedit. Philologiæ, sacræ, & civili historiæ, juris scientiæ, philosophiæ, mathematicis disciplinis nullum eruditionis genus sibi reliquum fecit. In quibus tantum profecit, ut cum in omnibus doctus semper sit habitus, tum ad singula maxime natus, aptusque judicaretur. Senferat prudentissimus Pater, non diutius proferendum esse, quin tam lata, ac tam uberima ingenii, animique seges, atque maturitas ad aliquem usum celebritatemque revocaretur. Cum cogitasset quodnam tantæ virtutis dignum theatrum potissimum deligeret, Romæ se facile animo obtulerat. Ipsum vitæ genus, quod ille susceperat, huic rationi mirifice cohærebat. Jamdiu enim Ecclesiæ nomen dederat, mox Sacerdotium inierat. Opportunus præte-

rea

rea eventus effecerat, ut ejus in Romam adventum ab amplissima dignitate auspicaretur. Nam vacuus inter duodec-viros litibus judicandis is locus erat, qui esse consuevit Germanæ genti jure attributus. In hunc porro locum JOANNES ERNESTUS suffectus, Romam migravit. Urbs plane tota admirata est hominem prope adolescentem in illud Collegium cooptatum, quod semper amplissimum est habitum, ad quod nunquam nisi gravissimis, sapientissimisque hominibus patuit aditus. Majorem etiam expectationem concitabat ejus, cui succedebat, spectatissimi, atque cum ætate, tum prudentia, & doctrina prævisti viri Jo: Benedicti Gentilotti adhuc recens, & omni laude ornata memoria, qui eo tempore mortem obierat bonis omnibus luctuosam. Verum quid ego commemorem quemadmodum tantam ille de se expectationem in ipso muneris primordio non solum sustinuerit, sed etiam superarit? Testes vos habeo, præstantissimi Duodec-viri, qui maximum vestro ordini ab illo ornamentum accessisse continuo intellexistis, semperque putastis. Vos etiam causarum actores appello, qui in ejus in agendo humanitatem, in percipiendo celeritatem, in jure dicundo prudentiam, doctrinam,

gra-

gravitatem tanti faciebatis, ut semper cum illo agere, semper ad illum causas deferre optaretis. Vos ipsos denique imploro, quos contra contigit, ut ille statueret, a quo nemo vestrum abjudicata causa, non ab omni offensione vacuus discessit. Ipsam enim iudicii asperitatem incredibili quadam comitate leniebat. Constabat præterea tantam inesse illi juris peritiam, tantam vero animi integritatem, ut neque ulla ratione a disceptantium subtilitatibus decipi, neque gratia unquam, aut precibus, aut vi ulla posset ab æquitate deflecti. Ii qui intelligunt quid sit duodecim-virum gerere, iidem profecto intelligunt, nullum ab hoc gravissimo munere tempus ad aliam rem vacuum, atque liberum dari. Causæ ab omni prope modum Christiano imperio huc deferuntur. Perpetuo procuratores audiendi, documenta expendenda, collegium adeundum, sententiæ pronunciandæ. Toto anno vix aliqui dies dati ad intermissionem laboris. Quid propterea? Num JOANNES ERNESTUS in uno jure delitescendum interea putavit? Uno eodemque tempore in omnium rerum luce versabatur, honestus, gravis, plenus officii, omnibus carus. Singulare enim ejus, & mirifice promptum ingenium, incredibilisque in agendo celeritas id efficiebat, ut non
solum

solum satis, superque suum munus expleret, sed etiam non parum temporis sibi reliquum faceret, quod universis Urbis institutis, intimisque rationibus vestigandis, quod claris familiaritatibus ad emolumentum laudis, atque prudentiæ ineundis, quod litteris præsertim colendis, provehendisque tribueret. Patebat quidem felicissima domus bonis omnibus, bonarumque artium præsertim studiosis. Ibi librorum ad amicorum commodam exquisita supellex, ibi Philosophorum frequentissimi concessus, ibi ingenii amœnitates, ibi gravissimarum rerum subtilissimæ disputationes. Huc profecto tanquam ad Emporium sapientiæ, atque ad humanissimæ, liberalissimæque jucunditatis perfugium conveniebamus. Utinam vero tantum mihi ingenii fuisset, quanta suppetebat ad eruditionem, & eloquentiam proficiendi facultas; certe ad hoc officium persolvendum aptior accederem.

Magna hæc profecto, AA, in ceteris omnibus, in illo quidem plane mediocria, si quæ me jam rapiunt, majora attendamus. Nimirum præclara illa virtus, mens illa excelsa certis quibusdam limitibus continebatur, donec sapientissimus hominum æstimator Cæsar, illius prudentiæ fama permotus, cum Oratoris munere publicis negotiis apud Pontificem maximum geren-

gerendis præficere constituit. Tum porro natus est veluti campum, quo ejus gloria longe lateque se effunderet, & in omnium admirationem propagaretur. Sinite AA. me paulo altius hujus præclarissimæ laudis principia repetere. Jamdiu est, cum oratoria facultas alio proposito præmio, alia atque his nostris temporibus suscepta officii ratione, summorum tamen hominum studiis culta, longe eminebat. Quamdiu enim ita erat reipublicæ ratio constituta, ut cum penes populum, tum penes optimates esset auctoritas, tandiu vel in concionibus, vel in Senatu dabatur facultas exercendæ eloquentiæ, qua potissimum sensus, animique multitudinis in quamcumque partem ducentur; plurimique extitere Oratores, quorum ambitio gratiam, auctoritatem, summos honores potissimo hoc præsidio quærebat. Verum cum maximæ rerum mutationes consecutæ essent, cum Romana Respublica everfa esset, atque labefactata, cum crebræ barbarorum incursiones otium, libertateque penitus sustulissent, quæ duæ res maxime erant, quibus oratoria facultas aleretur, corruit & ipsa eloquentia, atque adeo reliquæ simul optimæ disciplinæ corruere, a quibus vim omnem, atque ornamenta ipsa petebat. Quibus & si postremis temporibus suis sit honor restitutus,

ius, temporum tamen ratio, & rerum constitutioni-
 nes popularem istam eloquentiam ab omni emolu-
 mento excludere. Veruntamen Oratoris si officium
 est valde immutatum, viget certe adhuc cum nomi-
 ne longe, meo quidem iudicio, aucta dignitas, at-
 que amplitudo. Sunt enim nostrorum temporum
 Oratores Regum ad Reges pacis, concordiae, digni-
 tatis spectatissimi custodes. Regum personam substi-
 nent, fidem, & jura retinent. Agunt vero de iis,
 quæ si diserte, atque sapienter sint agitata non
 unius hominis salus, non privati fundi adjudicatio,
 sed otium populorum, imperii conservatio, publicæ
 majestatis provectio, nationum commercia, gentium
 vitæ commoda, ea denique omnia, quibus maxime
 humanæ societatis felicitatem constare arbitramur,
 consequuntur. Quis est igitur, qui si clarissimorum
 hominum officia splendore, ac dignitate, scientiam
 autem rerum gestarum utilitate, ac magnitudine me-
 tiri velit, non nostros antiquis Oratoribus ante-
 ponat? Quorum si in maxima multitudin- ho-
 minum ingenio præstantium, qui se ad hanc fa-
 cultatem applicavere, paucissimi propter incredibilem
 rei difficultatem inventi sint, qui aliquam essent per-
 fectionis speciem consecuti, iisdemque ob maxima
 muneris utilitatem, & amplitudinem tantum honoris

& exislinationis haberetur, quantum nulla ceterarum rerum præstantia sperare possent: qui demum viri isti nostri sunt exislimandi, quibus laudibus extollendi, qua commendatione celebrandi si qui extant egregii, & excellentes? Quorum eo laudabilior, & prope divina est virtus habenda, quo ejus difficilior est ratio, magnificentius officium, fructus ampliores, atque præstabiliores. Quæ cum ita sint, nunc quantum in hac facultate præstiterit J. Ernestus, attendite.

Equidem ego sic statuo, in summo hujus nostræ ætatis oratore has quatuor res inesse oportere: civilem prudentiam, probitatem, eloquentiam, & mansuetudinem; quarum ad oratoriam vim utilitatem, atque præstantiam ipse Orationis cursus declarabit. Quis igitur hoc homine prudentior esse potuit? Qui cum ingenium a natura accepisset ad gravitatem, consilium, atque sapientiam maxime comparatum, ortumque duxisset ex ea domo, quæ multis ab hinc sæculis senatoriæ scientiæ fuisset præclarissima quasi palæstra, nihil in tota ætate habuit antiquius, quam istos naturæ, atque domesticæ disciplinæ apparatus, studiis, industria, ac diligentia augere, atque confirmare? Qui pueritiam in iis litteris, quibus prudentiæ præ-

præsidia potissimum comparantur, adolescentiam in peregrinationibus ea ratione peractis, qua rerum humanarum usus, & scientia maxime conflat, traduxit? Qui Europæ provincias moribus, & cultu præstabiliiores non solum peragravit, sed omnia perdiscedo exploravit? Qui diversa populorum imperia perspicendo cognovit, multarum gentium mores, & instituta percepit? Qui hominum ubique administrandæ reipublicæ, & maximarum rerum usu peritissimorum familiaritatem coluit, præcepta audit, consilia perspexit? Qui Romam denique plurimarum gentium hospitium, universæ pacis conciliatricem, maximorum ad publica negotia consiliorum officinam, habuit in reliqua ætate firmiore civilis scientiæ ducem, atque magistram? Quæ omnia, etsi ex plurimarum maximarumque rerum ab eo gestarum eventu minime compertum habuissemus quantum prudentia vale-
ret, satis tamen declarant, eum ad publica negotia accessisse omnibus iis rebus instructum, quæ ad hanc singularem virtutem pertinere videantur. Verum quæ tanta, tam gravis, & tam difficilis res fuit ab ipso pertractata, quam non ex sententia Principis gesserit? Quæ disceptatio unquam forte extitit, quam non ipse maxima suorum utilitate, nulla alienorum

offensione ad finem perduxerit? Quodnam concordiae attenuandae periculum, quod non testis sua dignitate, summo nostrorum consensu, & approbatione vitari? Quae profecto ut perficere posset non a fortuna habuit, quae casu regitur, sed a se ipso, qui omnia ad consilium, rationemque referebat. Nam cum rerum omnium vim, nexumque diligenter perpenderet, intelligebat quae esset vera reipublicae utilitas, quae vera Imperii dignitas, noveratque, quod in quaque re verissimum esse perspexisset, ejus accuratissime, & celerrime videre, & explicare rationem, quae duo sunt, quibus prudentia maxime continetur.

Jam vero ad probitatem quod attinet, nihil est quod quaeratur quantum ipsa Oratori sit necessaria, quantum ad res bene gerendas afferat adjumenti. Multum enim interest qualis sit vir, qui nobiscum agit, ut minus in sententiam, vel facilius ducamur. Neque enim ulla res est, quae magis fidem faciat Orationi, quam probitas Oratoris? Quam si non a populari opinione, sed ab ipsa vi ejus atque indole metiri velimus, tantam sane fuisse in J. Ernesto inveniemus, quanta vix possit oratione complecti. Non enim laus probitatis posita est in quadam specie lenitatis, & indulgentiae, non in simulata se demissa

gerere.

gerendi ratione, non in quibusdam pietatis larvis
 consecrandis, non denique in iis rebus ullis, quibus
 maxime plebeculæ opinio captatur: sed in certo quo-
 dam & constanti animi instituto unam veritatem ha-
 bendi cum in dicendo, tum in agendo comitem per-
 petuam, & ducem. Ab hoc porro veluti quodam
 sancto, integroque fonte, omnia, quæ in illo ad-
 mirabamur, probitatis officia manarunt. Nullam enim
 rem potiore habebat, quam tum in verbis, tum in
 moribus veritatem. Nihil meditari, quod non ad re-
 ctam rationis normam dirigeret, nihil verbis profer-
 re, quod non ex animo proficisceretur, nihil moli-
 ri, quod non officium spectaret. Non causas inanes,
 non verborum anfractus, non rerum ambages fallen-
 dæ fidei quærere, sed rectam jugiter viam insistere,
 sinceram fidem colere, ingenium semper præstare,
 ut ille ait, *cui nulla suadet sententia malum*, integer,
 ingenuus, omnibus apertus. Quis præterea hoc homi-
 ne a nocendi cupiditate, quis a maledicentia magis
 alienus? Quis de omnibus benemerendi studiosior?
 Quis denique in omnibus officiis renitendis diligen-
 tior? Hæc sunt quidem germanæ notæ probitatis,
 quibus ille apud omnes, præsertim vero apud eos,
 qui intelligunt quid in quaque re vis, & ratio sit,

tantam orationi suæ tribuerat auctoritatem, ut semper audientium animos in quam vellet partem impelleret, sæpe hac una opinione gravissima negotia felicissime gesserit.

Age vero videamus eloquentiam, quæ cum sit conciliatrix humanæ maxime societatis, pacis instrumentum, atque custodia, laudabilium sæpe consiliorum procreatrix quædam, & quasi parens, hinc intelligimus nullum ad illud munus, quod societatem firmandam, pacem tuendam, ea denique quæ consilio geruntur maxime spectat, hac facultate aptius, ac magis accommodatum esse præsidium. Quam cum dico esse ei maxime necessariam, cui procuratio negotii publici commissa est, intelligitis AA. me non eam dicere, quæ in verborum consistit vel optimorum, & ornatissimorum sonitu inani, nulla rerum scientia subjecta: a qua levitate J. Ernestus ita abhorrebat, ut si quando sibi quid simile audire contigisset, festive irrideret. Est enim sua quædam ratio dicendi huic muneri attributa, quæ cum sit adhibenda non apud imperitam multitudinem, sed apud lectissimos viros, eo majoris ingenti est habenda, quo difficilius prudentes homines artificio capiuntur. Ille quidem nescio ego an studio, vel exercitatione, an potius

tius vi quadam mentis, qua quid in quaque re optimum esset internoscebat, id plane dicendi genus sibi arripuerat, quod præstantissimum ejus officium maxime deceret: Grave scilicet, robustum, decorum, & maximorum hominum sensibus, ac mentibus accommodatum. Primum habebat a natura, ut ad peregrinas linguas quam celerrime perdiscendas aptissimus esset, quarum eas, quæ cultu, & usu in Europa habentur præstabiliores, ita callebat, ut nemo indigena commodius iis uteretur. Ipsam vero eloquentiam non a palæstra promebat, sed ejus decus ab ingeni cellitate, robur, ac ordinem a judicii subtilitate, gravitatem, & copiam a maximarum rerum seminibus, quæ in ejus animo uberrime pullulabant, universam denique vim, ac rationem a præcipua quadam, ac late diffusa sapientia. Nam cum plurimarum rerum cognitione J. Ernestus excelleret, singularis quædam erat laus ejus ac scientia in iis rebus, quæ maxime a reipublicæ administratoribus in controversiam ducuntur, in sœderibus, passionibus, statutis Populorum, Regum, Pontificum, in universo denique belli jure, ac pacis, civili, & sacro. Singula præterea orationis quasi tempora noverat. Erat cum subtili disputatione, eademque dilucida utendum

putaret, erat cum fuscè latius perpetuam orationem adhibendam, erat etiam cum leporem quendam cum liberalitate, atque urbanitate conjunctum usurpandum existimaret. Quæ omnia, ubi res postularet, ita præstabat, ut neque vehementius quisquam urgeret, neque aptius doceret, neque venustius delectaret. Ego vero nexum quendam perpetuum orationis in eo præcipue admirabar, quo ille etiam in domesticis sermonibus ita utebatur, ut si quando aliquid a consuetudine, & sensibus hominum alienum sibi probandum sumeret, ut animi causa consueverat, nulla ratione refelli posse videretur. Verum quid est, quod ego aut ejus eloquentia dignum, aut vobis novum possum afferre? Ipsimet AA. quamplurimi sæpius, multi etiam quotidie audistis, neque unquam audistis non diserte cum subtilitate, non apposite sine furore, non graviter cum jucunditate dicentem; nunquam aurium, nunquam animi satietatem ab ejus oratione retulistis.

Verum ne ego nimis id præstem, quod ille semper accurate vitavit, veniam ad mansuetudinem, de qua reliquum est ut pauca dicantur. Non me latet esse qui existiment, eam, que in privatis hominibus mansuetudo & habetur, & laudatur, in oratoribus plane humilitatem

tatem olere, & ab eorum officio tanquam ejusdem perniciem esse penitus exterminandam: quamobrem eorum a quibus mittuntur dignitatem, decus, ac jura acriori quadam severitate potius quam lenitate putant esse tuenda. Esto quidem sua cuique opinio. JOANNI ERNESTO certe erat longe sententia, ratioque diversa, quæ tamen ei quasi oratoris laudis cumulum attulit. Id enim suo sibi jure sumpserat, ut omnem in universa vita rationem persequeretur, qua hominum animos, præsertim vero eorum, quibuscum publice ageret, sibi quam maxime adjungeret. Verum quid aptius ad aliorum benignitatem captandam, quam ipsa benignitas, & mansuetudo? Quid contra ab alliciendis animis magis alienum, quam asperitatis ostentatio, quæ una potest omnis oratoris industriæ fructus labefactare? Qui enim fieri potest, ut rem exoptatam impetres, si quantumvis prudens, probus, atque disertus, iis, a quibus petis, te implacabilem præstes, atque omnia terro supercilio, ac regio spiritu extorquere contendas? Jure ille existimabat præterea, Oratores ea mente a principibus ad principes mitti, ut sint pacis, concordisque artifices, atque altores, quam si per dissidia, & quasi per belli irritamenta præstare nitantur, nihil plus

agant, quam contra rerum naturam contendere, & officiorum rationem omnino pervertere. Quamobrem cum pacem pacis artibus colendam putaret, dedit operam, ut quæ sibi a natura inesset ad mansuetudinem conformatio, eam etiam animi attentione, atque vigilantia in maximam sui muneris utilitatem revocaret. Quis enim audivit unquam contigisse, ut inter eum, & nostros rerum gerendarum curatores ulla fuisset cum acerbitate dissensio? Quæ unquam negotia? Quæ de republica controversiæ vel gravissimæ exstiterunt, quas ipse non tam exigui speciei laboris, non tam soluta agendi dexteritate, non tam hilari vultus significatione, quam si ludus sibi essent, transegerit? Id sane fama constat clarissimorum hominum consensu contestata. Tum vero quæ, & quam illustri celebritate in eum CLEMENTIS XII. P. M. declarata benignitas! Quis, quantus, & quam incredibilis procerum amor! Quæ veluti præclarissima ejus potissimum mansuetudinis testimonia palam perspiciebamus. Verum quas laudes, quos fructus, quæ bona videremus ab eo per hanc unam virtutem parta, si nobis privatis hominibus liceret arcana rei-publicæ introspicere, & in lucem proferre? Ex quo intelligitur tantum abesse, ut ejus facilitas dignitatem
immi-

imminuerit, ut contra amplificaverit auctoritatem. Quare cum eximia esset in eo prudentia, & reipublicæ peritia, singularis probitas, ac integritas, summa dicendi vis, atque sapientia, incredibilis humanitas, morumque lenitas, omnia denique præsidia, quibus maximorum hominum, atque principum amor, benevolentia, opinio, admiratio comparatur, quid dubitamus affirmare, eum ad supremum oratoricæ laudis gradum jam pervenisse, præsertim cum clarissimi viri, iidemque civili scientia spectatissimi hanc ipsam de illo sententiam tulerint?

Multa, & præclara de eo dixisse videor AA; & fateor quidem. Sed plura adhuc, & fortasse clariora reliqua essent dicenda, si modum orationis pati possent. Nam quæ egregia res est? Quod præstabile officium? Quæ laudabilis vitæ institutio, ad quam non videretur maxime natus? Quod egregium facinus suscepit, quod non summa cum laude perfecit? Ad quam artem ingenuo homine dignam animum adjunxit, quam non ita tractavit, ut ad eam potissimum comparatus judicaretur? Quæ gens, quæ natio, quod genus hominum, quorum, ut suis quique dotibus excellunt, non eas ita in se transfulerit, ut apud quoscumque versaretur, poneretur princeps,

habereturque carissimus? Quem igitur hominem, quam beatum, & quam pene divinum existimabimus, in quem tot, tantaque bona coaluerunt; quæ singulis gentibus, & singulis fere hominibus sunt peculiariora, atque divisa! Nisi apud eos verba facerem, qui in illum adspectu, usu, familiaritate diu cognitum habuerunt, vereretur profecto, ut mihi fides haberetur. Sed ipsimet eum vidistis, AA, uno tempore tria maxima, atque gravissima munera egregie sustententem, quorum singula totum, vel summæ virtutis hominem postularent: Judicis, Oratoris, & Episcopi. Cujus postremi si quis existimet non integram laudem ei esse tribuendam, is perperam existimat: At ab Ecclesia sibi credita semper absuit. Nunquam suum gregem visitavit, nec vidit. Vero quid tum inde? Si ejus rei non solum a culpa longissime abest, sed etiam maximam consecutam gloriam adjungit. Si Principis utilitas, si P. M. auctoritas, si Reipublicæ ratio id flagitavit, nonne idipsum majorem in eum admirationem movebit, cum Episcopatum tanto diligentia, consilii, omnisque pontificiæ virtutis fructu absens administraverit, quantum nemo unquam præsens attulerit? Non satis dici potest, quantam solertiam adhibuerit, ut Ecclesiæ suæ statum, rationes,

indi-

indigentias omnes penitus cognosceret, quantaque prudentia, atque studio ejus incommodis mederi, optimæ institutioni providere, felicitati consulere curaverit. Non omnia singillatim persequi possum, AA; sentio enim moderandum mihi esse orationi, fugiendamque vestram molestiam. Duo tantum officia leviter attingam, doctrinæ nimirum, & charitatis, quæ cum in Episcopis omnibus potissima habentur, tum sibi maxime præstanda censuit ob peculiarem Ecclesiæ suæ conditionem. Etsi enim Nittræ a me tantus habetur honor, quantus nobilissimæ urbi videatur esse tribuendus, non tamen dissimulabo ipsius, totisque illis regionibus communem in litteris calamitatem, quarum vel nulla est, vel certe prava, & inutilis tradendarum, colendarumque ratio. Ex qua littararum inscitia incredibile est quantum detrimenti res Ecclesiastica capiat, quam enormes christiani officii perversiones, quam multi, & perniciosi errores in Evangelicam doctrinam irrepere possint. Quæ cum ille singulari quodam judicio intelligeret, nullum non movendum lapidem existimavit, ut optima studia in Ecclesiam suam inveheret. Magnum plane opus, multisque difficultatibus obstructum, multa etiam diuturnitate maturandum. Cujus propterea potuit ille qui-

quidem pro ratione temporis aptissima semina spargere, fructus vero, quos uberrimos speraret, nullos capere potuit. Cum didicisset quosdam juvenes Nittrieneses religiosi ordinis Romam venisse, ut studiis operam darent, nihil secum præclarius agi potuisse putavit. Ad istos adolescentes oculos continuo, animumque adjecit: nunquam destitit eos cohortationibus incitare, consilio adnovere, opera, atque auctoritate adjuvare. Quos cum vidisset non mediocriter profecisse, jam cogitatione prospiciebat quantam allaturi essent utilitatem ad eam rem, quam mente moliebatur. Statuerat enim in Ecclesia sua scholas, quæ nullæ sunt, instituere, in quibus plurimi juvenes alerentur, imbuerenturque litteris, doctrinisque solidioribus. Hinc sperabat futurum esse, ut aliquando educeret idoneos viros sui operis Vicarios, atque Ministros, qui ad maximum probitatis, atque doctrinæ fructum & Civitatem, & agrum revocarent. Verum longe majus quiddam, latiusque diffundendum bonum excogitaverat. Latissime in Germania pater S. Benedicti institutum, plurimaque extant Monachorum coenobia, eademque frequentissima, quæ propter Magistrorum inopiam vel nulla habent studia, vel prorsus inania. Jamdiu erat, cum iniquissimo animo ferebat, quod cum

cum ejusdem ordinis Monachi tum in Italia, tum in Gallia Sanctorum Patrum scientiam, & dogmaticam Theologian, criticem sacram, & reliqua hujusmodi summa cum laude, & fructu profiterentur, ac docerent, iidem in Germania, si qui theologiæ edarent operam, in solis vocularum captionibus, & quæstionculis plane supervacaneis sine sua, sine aliorum prope ulla utilitate occuparentur. Animadverterat porro sæpe accidisse, ut unius viri judicium, & scientia certam hominum societatem, seu provinciam vel universam ad sanitatem moris, aut doctrinæ revocasset. Noverat nostros etiam Monachos non multis ab hinc annis in eadem esse calamitate versatos, apud quos per duos tantum vel tres homines suum sacris studiis honorem fuisse restitutum. Audiebat præsertim Patavinum. S. Justinæ cœnubium incredibili quadam sacrarum scientiarum laude florere, & vehementer admirabatur tanti, ac tam præclari, & fructuosi ornamenti unum Leandrum Portiam nunc R. E. præstantissimum Cardinalem principem, auctoremque extitisse. Quibus rationibus, & exemplis adductus, quatuor ex Germania adolescentes monachos ingenio eximios Romam arcessere constituerat, qui a doctioribus magistris solidissimam doctrinam haurirent, donec universam

versam sacrarum studiorum, optimamque rationem adepti essent. Tum denique in Patriam reverti; ibi eos magis, ac magis consiliis confirmare, auctoritate tueri, omnibus adjumentis instruere. Spes erat injecta illi, plane explorata hoc pacto fore, ut optima studiorum ratio primum in Salisburgensem academiam, in qua ab iisdem Monachis disciplinæ traduntur, deinde non solum in Nitriensem Ecclesiam, sed paulatim in totam etiam Germaniam propagaretur. Id vero non uno animo finxerat, sed jam prope erat, ut reapse perficeret. Magnum sane, atque excelsum consilium, cujus rationem ubi primum mihi declarasset, jam inde cum maximis rebus toto orbe terrarum gestis conferendum putavi, & memoria hominum celebrandum sempiterna.

Jam vero quid ejus flagrantem caritatem commorem, cujus hæc ipsa sacræ doctrinæ proferendæ cupiditas, atque cura ab eadem virtute potissimum manabat? Qui præterea cum annos tres pontificatum non sane tenuem gesserit, prioris biennii redditus omnes, partim in pauperes alendos, qui ob regionis naturam, in qua neque commercii opportunitas, neque industræ locus magnopere patet, plurimi sunt, partim in farcienda, atque agenda prædia, ex quo uberiora dein-

deinceps largitatis alimenta suppeterent, conferendos putavit? qui postremo tandem anno re domesticas satis firmata, atque aucta sestertiumque millibus fere trecentis superantibus, quæ demum in rem suam privatam ob sumptus quidem legitimos nonnihil labentem, & ære etiam alieno non plane liberam convertere statuerat; cum cognovisset teterrimam pestilentiam, quæ per plurima Pannoniæ loca grassata erat, etiam in Nitriensem agrum jam pervasisse, maximamque cædem minitari; cumque intelligeret ejus vim, atque aciem egestatem potissimum & rerum inopia foveri, atque intendi, summa continuo diligentia, & celeritate, nulla sui non solum commodi, sed etiam necessitatis habita ratione, eam omnem amplissimam pecuniam articulo temporis in populi sui ab atrocissimi morbi periculo cautionem, atque salutem erogandam curavit? Quo uno liberalitatis præsidio regionem illam a vastitate servatam esse, & huic uni plurimas tenues familias incolumitatem acceptam retulisse compertum est. Quos igitur, & quantos beneficentiæ fructu ab eo, si diutius vixisset expectare licuisset, qui toto triennio, quo opulentam Ecclesiam administravit, sibi de ejus censu nihil reliquum fecerit? Cujus caritas eo laudabilior,

& ma-

& magis, germana mihi semper est visa, quo ejus argumenta non a sensus temeritate, non a miseræ conspectu, non denique ab ullo humanitatis invitamento, sed ab uno, eodemque integerrimo, & ab omni humanarum rerum contagione prorsus immuni caritatis officio petebat. Quapropter nolite quærere, quantum Nitriensis Ecclesia eum, quem nunquam vidisset, diligeret tamen, atque suspiceret. Nemo pastorem unquam, aut patrem tanta pietate, & observantia coluit. Quæ erat autem ejus populi, & sacerdotalis præsertim ordinis expectatio? quæ alacritas? quæ ad spem erectio? Felicitatem enim omni opinione majorem consecuturos esse sperabant miseri; ubi illum contueri, & tantæ prudentiæ, humanitatis, doctrinæ, liberalitatis bona a præsentis quasi fonte haurire potuissent. Verum non eorum solum, sed bonorum omnium spes maximæ collapsæ sunt.

Namque cum omnia ei fausta, atque præclara Roma polliceretur, precaretur Italia, Germania flagitaret, universa expectaret Europa; cum CÆSAR cogitaret quo potissimum præmio hominem quam liberalissime ornaret, cum ipse jam prope esset, ut ad quodlibet dignitatis, fortunæ, auctoritatis fastigium progrediretur; lethali morbo coreptus, undecimo die
morte

morte importunissima extinctus est. O rerum humanarum fragilem conditionem, & incertam, o hominum vita spei quidem falsæ, & cogitationibus vanis, inanibusque consiliis latissime patentem, temporis vero angustissimo spatio interclusam, cujus splendidior sæpe fortunæ species iccirco apparet, ut luctuosius morte frangatur. Nam JOANNIS ERNESTI nisi tam illustris vita fuisset, mortem minus doleremus, levio-remque jacturam fecisse putarem. Sed ea tamen in illo tum vitæ, tum mortis ratio contigit, ut recte diligenterque rem exploranti ipsa mihi vitæ fortuna, atque amplitudo mortem ipsi beatiorem, nobisque fructuosiore effecisse videatur. Si enim in rerum vel maxime appetendarum despicientia posita est magnanimitas, nisi plurima, eademque maxima habuisset, quæ despiceret, nisi in eo scilicet ætatis flore, in ea bonorum omnium copia, in ea spe, atque celebritate ereptus esset, neque sibi tam immortalem fructum peperisset, neque nobis tam singulare magnanimæ mortis exemplum reliquisset. In extremo enim ejus vitæ obitu non solum constantiam, alacritatem, animi erectionem ab aliis sane atque a philosophiæ fontibus petitam vidimus, sed quidquid sanctum, excelsum, atque cœlestē a suprema divini numinis virtute manare unquam

unquam potuerit. Nam ubi primum sensisset morbi vim invalescere, & aliquam periculi suspicionem facere, totum se colligendum, & a carissimis amicis, atque ab omni humana cogitatione revocandum putavit. Nihil deinceps mente cogitavit, nihil verbis declaravit, quod non æternum, divinamque redoleret. Quis autem vel summo ingenio, & faciendia præditus posset referre, quæ ille moriens de humanarum rerum vanitate, de hominum stultitia, & vivendi temeritate, de Christiani hominis, ac de Episcopi officio, de perenni, atque infinita Christi meritorum virtute, de constanti in eo posita fiducia, quarum rerum se exemplum cum demisse, tum fidenter proponebat, sapientissime atque sanctissime differoit? Plurimam se quidem dicebat habere CÆSARI gratiam, quod se maximis ornamentis, ac muneribus decorasset, tunc tamen eo loci esse, ut intelligeret, multo majorem habiturum si se in obscuritate jacentem, vel in Ecclesia sibi credita delitescentem reliquisset. Ibi sperare, se minus a suo erga Deum munere fuisse decessurum. Probe tamen perspicere, & palam profiteri, se, si diligenter cavisset, suo & in Principem simul, & in Deum officio satisfacere potuisse: quod cum minime fecisset, cum dignitatem sibi tributam

ram in sui perniciem, & in aliorum offensionem forte convertisset, id sibi uni esse maximo vitio vertendum, id unum esse, ex quo summo animi dolore cruciaretur. Tum postea ad solatii cogitationem se referens in ipso mœrore, & lacrymis lætus, & quasi renidens, se optime intelligere commemorabat, quæ esset Christi Salvatoris erga miseros homines pietas, quas ille sibi adversus eos partes jam inde ab omni æternitate suscepisset: hunc sibi adesse apud Tribunal Dei ducem, sequestrem, atque sponsores: hunc jam secum intimo sensu percipere communicantem, qui mirifica illa atque gratuita commutatione, sibi innocentiam substitueret, omnesque suas notas penitus delendas absorberet, quique ad certissimam se æternæ felicitatis spem erigeret. Inter hæc, cum aliquem ex domesticis, qui aderant, immoderatus lugentem animadvertisset, quid doletis, inquit, quasi maximo meo bono invideatis? Enimvero sic habetote, me nihil ægrius laturum, quam si renunciaretis, me esse a mortis periculo ereptum. Quid est enim, cur vitæ sit optanda diuturnitas, cujus vel perexiguum curriculum tantam mihi, ac tam latam, miseriam, & erroris segetem præbuerit? Id quidem, si fieri posset, libentissime mihi sumerem, ut scilicet eatenus convalescerem,

quoad

quoad omnibus hominibus, quæ mihi sit a meæ jam ætæ vitæ ratione dissensio, quæ itidem sit, semperque in animo fuerit ad religionem adjunctio quam perspicuis indiciis patefacerem, mox rursus me ad istas meas mortis delicias reciperem. Id vero est quod mihi vehementer optandum puto. Verum cum Deus Opt. Max. id minime ferat, me ita ejus & voluntati præsto, & fidei permitto, ut quovis pacto mecum optime actum iri existimem, neque in vita ullum solatium, nullam jucunditatem meminerim, que cum hac mea mortis expectatione sit conferenda. His ille perpetuis vocibus, hac intermissa nunquam animi alacritate, & flagrantia mortem felicissimam obiit. Quam si diligenter perpenderitis, A. A. non diutius ab oratione mea, quæ jam fuscè longius processit, doloris medicinam expectandam putabitis. Ipsa enim rei cogitatio non solum ad solidissimum solatium, verum etiam ad multo salutarius quiddam revocat animum: cujus mihi certe is ex eo tempore sensus inest, ut neque hanc vitam magnopere amandam ducam, neque mortem pertimescendam.

F I N I S.

